



11. Juni 20226

UPA 2026/131

Imminut toquttarnermut peqqutaasinnaasut suunersut, inuiaqatigiinnilu akisussaaffik qanoq inissisimanersoq pillugu Inatsisartunut apeqquteqaat aallaavigalugu oqallisissiasatut siunnersuut.
(Inatsisartunut ilaasortaq Aqqalu C. Jerimiassen, Atassut)

Apeqquteqaat aallaavigalugu oqallittoqarnissaanik Aqqalu C Jeremiassen Atassut qujanaq, oqallinnissamut pingaarutilimmut ajornakusoorsinnaasumullu.

Ajoraluartumik inuunermik kipisiinnartarneq tamatsinnut attuumassuteqarpoq. Kisitsisit nalunngisatta tunuaniippoq inuk., ilaquataasut, ikinngutit inuiaqatigullu, aliasunnermik apeqqutillu akineqanngittut nassataralugit ingerlaqqittariaqartut. Taamaattumik pingaaruteqarluinnarpoq inuiaqatigiittut imminut toqunnissamik eqqarsaateqarneq kiisalu qanoq pitsaanerpaamik inunnik neriuutaarutitsinnginnissaq pillugu ammasumik oqaloqatigiittuarnissaq ingerlatissagipput.

Siumumi isumaqarpugut imminut toquttarneq inuiaqatigiinni ajoraluartumik ajornartorsiutigigipput ataasiinnarmik pissuteqartutut nassuiarneqarsinnaanngittoq. Paarlattuanilli takusarpagut tarnikkut atugarliorneq, anniaatit misigisat, inooqatigiinnermi ajornartorsiutit, atonerluinerit, kisimiinneq, aningaasaqarnikkut ajornartorsiutit, annaasaqarnermik misigisaqarneq, nakuusernerit, meeqqanut sumiginnaaneq aammalu ikiorneqarnissamik periarfissaqannginneq imminnut ataqatigiissinnaanerit. Taamaattumik pingaaruteqarpoq ilisimassallugu inuttut ataasiakkaatut, ilaquataasut, nunaqqataasutut pisortanilu tamatta akisussaaffeqaratta. Oqallisigisarput inuup kialluunniit kisimiilluni kivissinnaanngilaa.

Siumumiit isumaqataavugut imminut toqunnermut pissutaasut pillugit ilisimasaqarnerput suli nukittorsartariaqaripput. Ilisimatusarneq uppersarsaasersuinerlu pingaaruteqarluinnarput pinaveersaartitsinermik suliaqarnermut pitsaanerpaamik sammisinnaassagutsigit. Taamaattumik aamma pitsaasutut isigaarput ilisimasaq naluneqanngereersoq ilanngullugu sulisoqassasoq aammalu ilisimatusarnikkut sutigit amigaateqarnitta sumiissusersiniarneqarnissaa. Ilaatigut tarnikkut peqqissuuneq, inooqatigiinnermi atugassarititaasut, misigisimasanit anniaatit, kulturi aammalu nunatsinni inuuniarnermi atugassarititaasut akornanni ataqatigiissinnaapput. Ilisimatusarnerit pioreersut takutereerpaat peroriartornermi artornartunik atugassaqsarmaneq, nakuuserneq, kinguaassiuutitigut atonerluinerit , atonerluineq, piitsuussuseq kiisalu tarnikkut nappaatit ulorianartorsiortitsinnaasut. Taamaattumik ilisimatusarnerit nutaat ilisimasanik pigeriikkatsinnik ilassusiissooq, ilisimariikkanik taarsiinani.

Siumup ernumassutigisaasa ilangaat immitsinnut oqaluunnitsinni tamanik tusaaneqarlutillu takuneqarsinnaasut qanoq sunnuteqarsinnaaneri. Ataqqinninneq, ataatsimoorneq isumassuinerlu inuiaqatigiinni peqqinnartumik tunngaviumik naleqartitaapput.

Nikanarsaaneq, mitallerfiginninnerluunniit kisimiinnermik neriuutaarunnermilluunniit misigisaqarnermik annertusititsinnaavoq. Tamatta akisussaaffeqarpugut pilersitseqartaassalluta inuit takuneqartutut, tusaaneqartutut naleqartinneqartutullu misigitinnissaannut. Siumumiilli aamma oqaatiginngittoorusunngilarput imminut toqunnissamik pinaveersaartitsinneq siusissukkut aallartittartoq. Ilaqtariinni meeqqat toqqissisimasut. Meeqqueriviit pitsaasut, atuarfik



atungarissaarnermik sammivilik, sunngiffik sammisassa qarfiulluartoq aammalu najukkani inuiaqatigiinnik akuutitsilluarnikkut aallartittartoq.

Peqatigitillugu isumaqarpugut pinaveersaartitsinermi peqqinnissaqarfik, kommuunit, atuarfiit, pinerluttaalisitsisut kajumissutsiminnillu suliallit akornanni suleqatigiinneq nukittorsartariaqartoq. Pinaveersaartitsinermi suleqatigiikkaagatta pitsaanerpaamik angusaqartitsisarpoq.

Naggasiullugu Siumumiit oqaatigerusupparput erseqqissarlugulu imminut toquttarnermut akiuniarnermi kina pisuutinneqassanersumik samminninnerunngimmat. Ataatsimoorlutali oqaluuserisap ajornakusoorsinnaasup akisussaaqataaffigalugu samminissaanut tunngalluni. Ilisimaligassatsinnik nutaamik ujartuiuaannartariaqarpugut, pinaveersaartitsineq nukittorsartuarariaqarparput aammalu inuit amerlanerit neriummik peqartillugit ilaasutullu misigisimatitsisariaqarpugut.

Taamatut oqaaseqarluta siunnersuummut Siumumiit qujavugut. Oqallilluarisilu.

Jess Svane SIUMUT